

Tkanje kao diplomatija: Kako je jedan zanat doveo sedam ambasadora u Sandžak



Sedam ambasadora posjetilo je Novi Pazar u okviru Druge kolonije tkanja, koja se od 10. do 13. juna održava u organizaciji Grada, Turističke organizacije Novi Pazar, **Etno mreže** i Udruženja "Pazarski bazar rukotvorina".

Delegaciju diplomatskog kora čine ambasadori Ujedinjenog Kraljevstva, Albanije, Japana, Norveške, Konga, Brazila i Gane.

Gradonačelnik Novog Pazara Nihat Biševac upoznao je goste s najznačajnijim kulturno-historijskim znamenitostima, uključujući Bedem, Džepšanu, Motrilju, Altun-alem džamiju, Staru čaršiju i Isa-begov hamam. Delegacija je potom posjetila Tkačku koloniju, gdje su razgovarali s tkaljama i upoznali se s tradicionalnim tehnikama tkanja. U programu je bila i posjeta manastiru Đurđevi stupovi, koji se nalazi na **UNESCO** listi svjetske baštine.

Obraćajući se prisutnima, gradonačelnik Biševac istakao je značaj manifestacije za grad i njegovu promociju u svijetu.

"Novi Pazar je domaćin Tkačke kolonije, manifestacije koju organizuju **NALED**, **Etno mreža**, Turistička organizacija Novi Pazar i Udruženje Pazarski bazar rukotvorina'. Cilj kolonije je očuvanje starih zanata, kulturnog naslijeđa i osnaživanje žena. Posebno nam je zadovoljstvo što je naš grad domaćin delegaciji od sedam ambasadora. Njihov višednevni boravak u Novom Pazaru prilika je da upoznaju našu tradiciju, kulturu i ljude, ali i da iz našeg grada ponesu najljepše utiske i poruke koje će doprinijeti promociji pozitivne slike Novog Pazara u svijetu", rekao je gradonačelnik Biševac.

U ime diplomatskog kora obratio se ambasador Ujedinjenog Kraljevstva Edvard Ferguson, koji je izrazio iskrenu zahvalnost domaćinima i oduševljenje gradom.

"**U** ime svih kolega želim da izrazim iskrenu zahvalnost na srdačnom dočeku. Oduševljeni smo posjetom i ovim prekrasnim gradom koji se izdvaja kako svojom geografskom ljepotom, tako i bogatim historijskim naslijeđem, zbog čega zauzima posebno mjesto u ovom regionu. Ovo je divan spoj hrišćanske i islamske kulture, tradicija i vrijednosti koje vjekovima oblikuju njegov jedinstveni identitet. Kako sam sa suprugom jedno vrijeme živio u Sarajevu, gdje se rodila i naša kćerka, dolazak u Novi Pazar i pogled na sebilj bude u meni posebne uspomene i emocije. Zbog toga se ovdje osjećam kao kod kuće. Duga historija Novog Pazara, sjajni ljudi i nezaboravno iskustvo, sve je to objedinjeno u ovoj posjeti. Želim da se zahvalim gradonačelniku Nihatu Biševcu i svim ljudima koje smo ovdje upoznali na toplini, srdačnosti i pažnji koju su nam ukazali", rekao je Ferguson.

<https://sandzacke.rs/featured/tkanje-kao-diplomati...>

2 / 2

Poseban utisak na goste ostavile su tkalje i članice udruženja, koje čuvaju zanat koji polako nestaje. Hajrija Nikšić, članica udruženja "Pazarski bazar rukotvorina", ukazala je da je ručni rad neprevaziđen i da se mladi moraju upoznati s tradicijom i njenim značajem.

"U samom početku smo pokušali organizovati kurseve za mlade, međutim nažalost nije bilo mnogo zainteresovanih. Uglavnom su to bile škole, gdje smo imali određene časove koji su održavani u muzeju i u školama, kroz volonterski rad, gdje smo djeci približavali vez i zlatovez. Ovo je veoma važno. Kada sam bila mlađa, ni mene to nije previše interesovalo, pa mi nije ni čudo što danas ni djeca nemaju veliko interesovanje. Ipak, kasnije sam se ponovo zainteresovala i naučila tehniku koju sam prilično dobro savladala. Ovo je lijepo i važno da se očuva, a sada vidim i da mladi ponovo žele da nose ono što smo mi nekada nosile", poručila je Nikšić.

Direktor Turističke organizacije Novi Pazar Dejan Belojica naglasio je da manifestacija ima višestruki značaj za lokalnu zajednicu. "Čuvamo zanate od zaborava, afirmišemo žensko preduzetništvo i promoviramo sve ljepote Novog Pazara. Cilj nam je da dodatno pozicioniramo Novi Pazar na turističkoj mapi Srbije i regiona", rekao je Belojica.